

famille qui n'est pas encore baptisé, quil feroit mieux de ne partir quau printemps pour aller querir ceux quil vouloit amener, et que iauois bien de La peine a le voir aller passer tout Lhyuer dans LAcadie auant que destre baptise: outre nos malades retournez de La guerre, nous en auons encor eu plusieurs autres dont quatre font morts depuis peu, entrautre vn Antien Capitaine mon frere que Iauois baptisé il y a trois ans, et qui depuis dix ans ne cestoit pas enyuré vne feule fois, ie ne lay Iamais veu tomber dans aucune faute et il faisoit icy La Ioye de tout le monde. IL est mort vn Capitaine de LAcadie depuis quelque mois que le fils ainé de Monfr. Damour a baptisé. Ce Capitaine aymoît fort La priere depuis trois ans et a passé tout ce temps sen senyurer, il á differé neantmoins Iusqua Larticle de La mort de se faire baptiser, disant quil apprehendoit de ne faire quelque peché apres son baptesme il tomba il y a quelques mois malade, il assembla tous ses parens a qui il fit vne forte exortation po^r. les porter a la priere, et a se faire baptiser, il enuoya querir le fils de Monfr. Damour, et il luy dit quil le prioit de le baptiser quil alloit bientoit mourir, apres quil leust baptisé il parut le plus Content du monde il a dit á Monsieur Damour qui sen alloit ie vous reuesray encore vne fois auant que de mourir et mourut de Lendemain apres Lauoir encor veu dans des sentimens qui paroissoient les meilleurs du monde voila ce que men a dit il y a quelques Iours le fils de Monsieur Damour qui estoit venu icy pour quelques affaires: quoyque ce Capitaine ne fut pas de nostre mission, ie vous ay rapporté cecy pour faire Connoître la disposition ou font les sauages dans LAcadie